


文
昌
七
曲
原
本
孝
經

明善書局發行所



慈善彙報發行部

流通三教經典

發行各種善書

備有詳細書目

函索即行寄奉

上海法租界嵩山路

明善書局

電話八一四八號

癸酉春正月

文昌七曲原本孝經

驥江朱立敬署



上海法租界愷自通路西

明善書局

嵩山路口二百四十八號

重刻文昌孝經緣起

謹案嘉慶六年以文昌帝君顯靈蕩寇

御書化成者定扁額頒發七曲山祠又重修京師地安門外成化

年間所修廟宇落成日

上展謁行九叩禮

御製詩章勒石諸臣恭和一時盛事曠古未有又欽奉

諭旨以文昌帝君主持文運福國佑民崇正教闢邪說靈蹟最著
海內崇奉與關聖大帝相同

特命列入祀典加春秋祭倣照關帝廟定制猗歟盛哉帝君之靈
爽自是益昭著宇內矣敬讀帝君訓世詩文浩如淵海劉

體恕有文帝全書朱文正公有文帝書鈔均以孝經為第一卷惟是孝經刻本多作六章乾隆初年黃正元十八章本出獨為完善周廣業文昌通紀亦謂廬山真面其在是矣今依黃本刊布復加圈以便讀焉

御製詩嘉慶六年五月九日

重修地安門外文昌帝君廟落成敬紀

成化殘碑榛莽尋。聿新殿宇帝居歆。禦災捍患功誠鉅。闡道宏猷澤實深。氣養大剛千古貫。文敷陰隲萬民欽。敬申祭典春秋祀。錫福綏邦鑒寸心。

文昌孝經序

文昌帝君自序

人莫重於敦倫。倫莫先於盡孝。哀哀父母。生我劬勞。欲報深恩。昊天罔極。此即承歡膝下。備物盡志。而西山薄暮。為時幾何。泪灑鵲紅。紙飛蝶白。與長卧泉臺者。有奚益乎。况敢生不盡養。沒不盡禮。祭不盡誠。一似此身出於空桑也者。若而人者。既昧人心。自登鬼錄。無怪乎地獄之中。累累而驅入也。予昔在七曲。仿先聖告曾子之意。作孝經十八章。昧者不察。改為六則。且贅以偈頌讚呪。滿紙皆西方梵唄之音。以致學者薄為瞿曇之書。掩卷不觀。予甚恨焉。黃子正元。有心世道。刻陰隲文圖說。普為勸戒。併請刻予孝經。予

喜其心之誠而意之善也。爰以七曲舊本付之。一切瞿曇之說。盡從刪刈。為人子者。試取而三復焉。未有不感發其天良者矣。是為序。

乾隆二年清和月閏中弟子黃正元敬識於袁浦公署

呂祖序

夫孝者。天經地義。自天子至庶人。莫有能外者也。末世士夫。每以庸近忽之。故或事績表著。寰區而庭幃不無遺憾。試思功名未立。猶可諉之時命。若倫常少舛。本之不植。遑問枝葉乎。夫當我身成立之際。父母之精力。漸已衰零。雖孳孳愛日。猶恐時不我待。而忍蹉跎荏苒。貽他年風木之悲。靜言以思。淚下涓涓矣。雖然。處富貴

之孝易。處貧賤之孝難。處康寧之孝易。處疾痛之孝難。孝之在養口體者易。孝之在養志者難。富貴者。備物聚順。諒不為靳。若簞瓢菽水。則惓惓之隱愈切。康寧者。從容色笑。可以承歡。若侍寢延醫。則懇懇之勤彌篤。至於養在口體。即中人尚可勉為。若親意所注。親力未逮。必委曲以全之。神相契而氣相孚。可謂視聽於無形聲矣。總之。此身為父母之身。此心即父母之心。守其身。斯無負其身。一其心。斯不愧其心。順之中不忘規。敬之中有深愛。咫尺不聞於千里。一日即可以百年。推之一出一入。有為親辱者。造次不敢妄作。一言一事。可為親榮者。竭蹶在所必為。斯不愧孝子之目。與所以出則為國家之良臣。處則為鄉閭之莊士。孝豈不切於人。而人

顧可庸近忽之也耶。我梓潼帝君。順理推情。準今酌古。作為是經。垂諸不朽。實牖世之金鑑。度人之寶筏。與世所傳孝經十八章相表裏。滇南董子良材。曾作直解。以便愚蒙。崔大夫傑者。寄任封疆。素敦倫紀。於部署之暇。發心梓行。此不獨盡一己之孝。且教人人同盡其孝。而并欲後之君子之咸臻於孝域也。予嘉其衷。因為之序。

乾隆十年歲次乙丑七月下澣二日前唐純陽子呂洞賓撰於駐雲壇

邱文莊公序

帝君以至孝而居文昌上位。一十七世為士大夫身現九十七化

行藏無在不以孝顯。敬誦經文十八章。父母育子之勞。曲盡其心。人子體事之懷。精悉其義。綱維至性。經紀民物。達自一孝。準諸萬事。摯而加切。約而加詳。廣宣教化。敷揚妙道。集眾孝之大成。而創千古之子則者也。宋西山真先生言。是經神妙。通明易曉。如家常說話一般。無不動智而覺迷。其理生天地。生萬物。幹陰陽而昭人極。洽羣類而建王綸。曾子十八章。直與帝君大旨相發明。所以為文明之首出乎。宜其藏之天府。斗為之旋。道為之運。置之巖阿。山永不崩。貯之水府。波臣順澤。麟趾不踐生草。鳳凰不食昆蟲。仁鳥反哺。順竹衛母。種種皆慈孝仁化所感。誠大羅命世至寶。實吾儒立教不易之宗。濬幼服帝訓。每日持誦是經。一夕靜懋文鏡齋頭。

夢帝君告誡曰。子誠能廣布經文。普勸世人。我當保汝甲第聯雲。位極人臣。濬因與同人構梓翻刻。廣施凡五千餘卷。闡試之日。見奎斗執筆挾卷跳躍於前。卷上大書金字。曰文昌孝經。須臾不見。頓覺祥光滿場屋。異香襲肢體。文思大徹。揮毫如意。果得天選高擢。噫嘻。濬之堅持孝經。非以期驗也。乃得奇驗應兆如此。始信帝君為靈赫赫。垂訓凜然。孝與不孝。洞鑒無遺。聖天子至治丕變。以孝為本。孰有加於經文開化之顯著哉。於是載鐫而闡述焉。以見孝宜自盡。為斯人之首務。庶不負帝君之諄諄告誡云。少保大學士邱濬仲深氏瓊山甫敬述

文昌帝君孝經

肇基章第一

此言父母之恩與天地等

帝君曰。乾為大父。坤為大母。含宏覆載。胞與萬有。羣類咸遂。各得其所。賦形為物。稟理為人。超物最靈。脫離蠢劫。戴高履厚。俯仰自若。相安不覺。失其真性。父兮母兮。育我者宏。兩大生成。一小天地。世人不悟。全不知孝。吾今明闡。以省大眾。乾坤養物。勞而不勞。父母生子。不勞而勞。

生子章第二

此言父母生子異常辛苦

帝君曰。父母於子。自字及妊。自幼迄壯。心力所注。無有休歇。十月未生。在母胎中。母呼亦呼。母吸亦吸。耽娠如山。筋疼血滯。寢處不

文昌帝君
舒。臨盆性命。若不自保。父心關惻。母體擔虞。縱令易誕。費盡勞苦。若或遲久。不行分娩。艱難震恐。死中幸生。幾舍其母。始獲其子。一月暗居。三年乳哺。啼即懷抱。猶恐不調。睡令安寢。戒勿動搖。含食以飼。貼衣以裹。諒其飢飽。適其寒暑。

保護章第三

此言父母於子保護周摯

帝君曰。父母於子。痘疹關煞。急遽驚悸。咿唔解語。匍匐學行。手不釋提。心不釋護。子年既長。恐其不壽。多方保持。幸而克祐。籌畫有無。計其婚媾。厥齡方少。諸務未曉。一出。一入。處處念之。綢繆咨嗟。諄諄誡命。親心惆悵。子方燕樂。

教育章第四

此言父母教誨極其詳盡

帝君曰。父母於子。教之生計。教之成業。母誕維艱。父誨匪易。雖至英年。恤若孩提。食留子。餐勝如己餐。衣留子衣。勝如己衣。子若有疾。甚於己疾。有可代者。己所甘受。子若遠遊。行旅風霜。夢寐通之。踰期不歸。睛裂腸斷。子有寸善。誇揚樂與。子有小過。回護遮蓋。暗自傷心。恐其名敗。子唯賢能。父母有賴。子若不肖。父母誰倚。子若妄為。父母身危。作事未事。俱切親情。芽莖茁培。堂基構植。母勤子生。父作子述。其行其志。不厭其苦。憐子念子。何時放置。形或暫離。心恆無閒。

同秉章第五

此言愛子之心。父母所同。

帝君曰。父母於子。貴如帝王。神如天亶。顯如公卿。賤如編戶。愚如

齊氓。皆如是心。窮達愁樂。存沒明幽。皆如是心。混沌初分。亘古及今。普天匝地。綿綿惻怛。父母之心。無不如是。如乾覆物。如坤載物。和藹流盈。充塞兩間。莫大慈悲。無過親心。

根心章第六

此言孝根於心子當自盡

帝君曰。凡為人子。當以二親體我心者。還體親心。體我此身。骨稟父生。肉稟母成。一膚一髮。或有毀傷。親心隱痛。子心何安。心為身主。太和蘊毓。父兮所化。母兮所育。一有不孝。失親本來。孝先百行。根從心起。

承歡章第七

此言人子事親承歡無間

帝君曰。凡為人子。定省溫清。時以敬將。每作一事。思以慰親。每發

一言思以告親。入承親顏。親歡我順。親愁我解。出必告親。恐有惡行。以禍親身。歸必省親。恐有惡聲。以拂親心。力行戒慝。隨時加惕。口業不干。身業不作。恐有意業。欺親欺身。恐有心業。累身累親。

體志章第八

此言廣愛廣敬以體親心

帝君曰。我有手足。父母一體。異母兄弟。總屬天倫。恐有參商。殘親肢體。叔伯同根。宗族一家。恐有乖戾。傷親骨肉。祖曾上人。恐失奉事。悖親孝思。子孫後裔。恐失字育。斷親嗣脈。恐失教訓。敗親家規。子姪世系。恐失敦睦。貽親庭釁。我夫我婦。子媳之職。恐失和敬。致親不安。我有姻婭。屬親至戚。恐失夙好。致親不寧。上而有君。為親所主。恐有不忠。致親以逆。下而民物。與親並育。恐有不恤。損親之

福外而朋友為親之輔。恐有不信。絕親友道。師為我法。即為親箴。事恐失賢。以違親訓。匪人僉壬。親之所遠。交恐不擇。以累親志。仰而天高。帝位乎上。日月星斗。親所敬畏。恐有冒瀆。妄干天怒。致重親辜。俯而地厚。羣生資始。親所奉履。恐有褻侮。業積暴殄。致延親禍。中而神祇司我親命。恐有過犯。致減親紀。

諭道章第九

此言諭親於道方為至孝

帝君曰。凡為人子。一舉一動。總期歸善。以成親德。我親有善。身順其美。救人之難。即是親救。濟人之急。即是親濟。憫人之孤。即是親憫。容人之過。即是親容。種種不一。體親至意。親或有過。委曲進諫。俟其必改。以善規親。猶承以養。養必兼善。方得為子。人各有親。曷

不懷思。父母在日。壽不過百。惟德之長。垂裕靡遐。是以至孝。

盡孝章第十

此言人子盡孝存沒如一

帝君曰。凡為人子。親在。一日得養。一日。堂上皆存。膝下完聚。人生最樂。惜此光陰。誠不易得。玉食三般。勺水一菽。各盡其歡。加餐則喜。減膳則懼。貧富豐嗇。敬無二心。願親常安。恐體失和。疾病休戚。常係子心。一當有恙。能不滋虞。藥必先嘗。衣不解帶。服勞侍寢。愈則徐調。食不輕進。相其所宜。倘或不痊。延醫詢卜。酒不沾脣。至心禱祝。殫厥念力。以求必痊。終天之日。飲食不甘。哭泣失音。衣衾棺槨。多方自盡。三年哀痛。晨昏設薦。佳塋厚穴。安置壟邱。禮送歸祠。親魂有託。廟享墓祭。四時以妥。去親日遠。追思常在。形容面目。若

聞若睹。動息語默。尋聲覓跡。中心勿忘。抱慕如存。生死同情。幽明一理。孝道由基。大經斯彰。嗟爾人子。縱能如是。體之親心。未及萬一。

愛日章第十一

此言親年無幾及時行孝

帝君曰。子在懷抱。啼笑嬉戲。俱關親心。實惟真摯。為人子者。能如是否。試一念之。何能暫釋。父母強健。能嬉能笑。能飲能食。子所幸見。父母漸衰。嬉笑飲食。未必如常。子心所惕。責我不楚。憐親力弱。嗔我聲微。憐親氣怯。愈加安養。勿致暫勞。父母謝世。苦無嬉笑。及我顏色。苦無罵詈。及我身受。縱有厚祿。親不能食。縱有錦帛。親不能被。生不盡歡。追思何及。逝者念子。存者念親。祭享悠遠。隔不相

見思一慰之。悲哀無地。言念斯苦。實難為子。

辨孝章第十二

此言孝有大
本當加明辨

帝君曰。吾今闡教。以示大眾。親存不養。親沒不葬。親祚不延。無故溺女。無故殺兒。父母客亡。骸骨不收。為大不孝。養親口體。未足為孝。養親心志。方為至孝。生不能養。沒雖盡孝。未足為孝。生既能養。沒亦盡孝。方為至孝。生我之母。我固當孝。後母庶母。我亦當孝。母或過黜。母或再嫁。生我勞苦。亦不可負。生而孤哀。恩育父母。且不可忘。何況生我同母兄弟。我固當愛。前母兄弟。我亦當愛。同氣姊妹。我固當和。連枝妯娌。我亦當和。我生之子。我固當恃。前室遺子。我益當恃。眾善家修。無不孝推。如是盡孝。始克為孝。始知百行。惟

孝為源。

推行章第十三

此言人道有虧即為不孝

帝君曰。為子之道。我孝父母。不敬叔伯。不敬祖曾。於孝有虧。我孝父母。不愛子孫。不敦宗族。於孝有虧。我孝父母。不和姻婭。不睦鄉黨。於孝有虧。我孝父母。不忠君上。不信師友。於孝有虧。我孝父母。不愛人民。不恤物命。於孝有虧。我孝父母。不敬天地。不敬三光。不敬神祇。於孝有虧。我孝父母。不敬聖賢。不遠邪佞。於孝有虧。我孝父母。財色妄貪。不顧性命。知過不改。見善不為。於孝有虧。淫毒婦女。破人名節。於孝有虧。力全名節。於孝更大。奉行諸善。不孝我親。終為小善。奉行諸善。能孝我親。是為至善。

恆性章第十四

此言孝本天性無容偽飾

帝君曰。孝之為道。本乎自然。無俟勉強。不學而能。隨行而達。讀書明理。因心率愛。因心率敬。於孝自全。愚氓愚俗。不雕不琢。無乖無戾。孝理自在。苟具靈根。知愛率愛。知敬率敬。於孝可推。孝庭子容。孝閭婦儀。孝男端方。孝女靜貞。孝男溫恭。孝女順柔。孝子誠慤。孝婦明潔。孝子開先。孝孫承後。孝治一身。一身斯立。孝治一家。一家斯順。孝治一國。一國斯仁。孝治天下。天下斯昇。孝事天地。天地斯成。通於上下。無分貴賤。

守身章第十五

此言守身勿失即是盡孝

帝君曰。所謂孝子。欲體親心。當先立身。立身之基。貴審其守。無身

之始。身於何始。有身之後。身於何育。有挾俱來。不可或昧。當思在
我。設處親身。愛子之身。勝如己身。辛勤乳哺。望其萌芽。冀其成材。
寸節肢體。日漸栽培。何一非親身。自勞苦。得有此身。親愛我身。如
是之切。保此親身。豈不重大。守此親身。尤當倍篤。遵規合矩。如前
所為。矜驕不形。淫佚不生。嗜慾必節。父母之前。聲不高厲。氣不粗
暴。神色溫靜。舉止安詳。習久自然。兢兢終身。保此親體。無虧而歸。
是謂守身。苟失其身。塊然軀殼。有負父母。生而猶死。抑知人生。體
相完備。即有其神。每日在身。各有處所。一身運動。皆神所周。神在
臟腑。欲不可縱。神在四肢。刑不可受。縱欲犯刑。非傷即死。凡有身
者。所當守護。守真為上。守心次之。守形為下。愚夫匹婦。無所作為。

亦足保身。何爾聰明。奸偽妄作。昧性忘身。沈溺慾海。全不省悟。皇矣上帝。觀見斯若。發大慈悲。降生聖人。以時救度。惟茲聖人。躬先率孝。加檢必謹。加恤必至。不忍斯人。墮厥親身。一切裁持。遂其所守。種種孝願。當身體物。體在一身。化在眾生。界茲凡有。同歸於道。身居不動。肆應常晉。如是守身。是為大孝。

敬孝章第十六

此言化惡歸善。教孝為先。

帝君曰。孝自性具。教為後起。世多不孝。皆因習移。愚既罔覺。智又誤用。聖人在上。惟孝為急。教之之責。重在師傅。尤當慎擇。賢良之師。化惡為善。不賢之師。變善為惡。師而不教。過且有歸。教之不善。其罪尤大。不賢之師。導之匪僻。引之邪佞。養成不肖。流為兇頑。越

禮犯紀。妄作無忌。雖欲救之急難格化。如是為教。罪實非輕。藥石之師。惟賢是與。行己端莊。導人忠信。教不他設。孝無畸行。因其本然。還所固有。朝敦夕誨。幼育長循。惟茲孝弟。化行是先。雖至愚氓。無不曉習。如是為教。功實不小。為功為罪。職豈易任。惟名尊嚴。其實如何。孝弟是宗。能孚孝者。弟亦本諸。助君為理。轉移風俗。全在師儒。教不可誤。師不可違。自重在師。率教在弟。孝原自具。有覺始興。

孝感章第十七

此言孝行所感無往不應

帝君曰。不孝之子。百行莫贖。至孝之家。萬劫可消。不孝之子。天地不容。雷霆怒殛。孝子之門。鬼神護之。福祿畀之。惟孝格天。惟孝配

地。惟孝感人。惟神敬孝。惟天愛孝。惟地成孝。水難出之。火難出之。刀兵刑戮。疫癘凶災。毒藥毒蠱。冤家謀害。一切厄中。處處祐之。孝之所至。祖宗積愆。悉得消滅。父母沈疴。即時痊愈。是以斗中有孝弟王。下有孝子。光耀乾坤。精貫兩儀。氣協四維。和徧九垓。星斗萬象。莫不咸熙。神行河嶽。海波不揚。遐荒是奠。遠邇均孚。孝之為道。功德普徧。

重戒章第十八

此言不孝之罪垂戒後世

帝君曰。夫人之生。養親有缺。且難為子。何況世人。毀罵父母。腹誹父母。親且毀罵。毆叔詈伯。弑君陵師。無所不為。子在懷抱。氣不忍吹。及其長也。愛之者真。訓之者嚴。以愛子心。用之撻楚。撻亦是愛。

嗔亦是愛。即有盛怒。子惟柔順。欲再杖時。手不能下。何爾世人。拒
親責己。如抗大敵。天怒地變。豈容大逆。子有病危。親處不安。何於
親疾。絕不關心。子有勞苦。親關痛癢。何況我體。犯法極刑。子苟不
育。淚不曾乾。冀其重生。傷入七情。何爾世人。父母終天。未及三年。
思慕中衰。饗祭失時。親骨不葬。且干不孝。何爾世人。貧發親塚。賣
穴暴露。嗟爾父母。念念及子。何爾世人。凡事用心。獨於父母。有口
無心。不肯實為。人之一身。諸般痛楚。何處可受。何爾化外。火焚親
屍。全無惻隱。美名火葬。於心最忍。夫人之死。口不能言。肢體難動。
心實未死。猶知痛苦。過七七日。心之形死。其形雖死。此心之靈。千
年不死。火焚而熾。碎首裂骨。燒筋炙節。立時牽縮。心驚肉跳。若痛

苦狀。俄頃之間。化為灰燼。於人且慘。何況我親。誦是經者。各宜省悟。苟無父母。烏有此身。報恩靡盡。銜慈莫極。

謹按坊間所印文昌孝經。凡有四本。參差不齊。一為文昌陰騭純孝真經。一從純孝真經內刪去呪讚偈訓餘文。悉仍其舊。共為六章。一則將前本重行刪除大半。亦六章。其文太畧。精華多失。惟七曲原本孝經十八章為文帝後來訂正之本。繁簡得中。特亟刊印流通。以餉當世。書成為綴其同異之故。於此時天運午會十二運七世第五年中元戊辰歲己未月辛酉滿日。西昌後學李時品沐手敬識。

文昌帝君孝經終

古今石印

三

文

吳

劉

之

石印

